

大正藏第 08 册 No. 0254

般若波罗蜜多心经 1 卷

No. 254 [Nos. 250-253, 255, 257]

般若波罗蜜多心经

唐上都大兴善寺三藏沙门智慧轮奉 诏译

如是我闻：

一时薄伽梵住王舍城鹫峯山中，与大苾芻众及大菩萨众俱。尔时，世尊入三摩地，名广大甚深照见。时众中有一菩萨摩訶萨，名观世音自在。行甚深般若波罗蜜多行时，照见五蕴自性皆空。

实时具寿舍利子，承佛威神，合掌恭敬，白观世音自在菩萨摩訶萨言：「圣者！若有欲学甚深般若波罗蜜多行，云何修行？」如是问已。

尔时，观世音自在菩萨摩訶萨告具寿舍利子言：「舍利子！若有善男子、善女人，行甚深般若波罗蜜多行时，应照见五蕴自性皆空，离诸苦厄。舍利子！色空，空性见色。色不异空，空不异色。是色即空，是空即色。受、想、行、识亦复如是。舍利子！是诸法性相空，不生不灭、不垢不净、不減不增。是故空中无色，无受、想、行、识，无眼、耳、鼻、舌、身、意，无色、声、香、味、触、法，无眼界乃至无意识界。无无明亦无无明尽，乃至无老死尽。无苦、集、灭、道，无智证无得。以无所得故，菩提萨埵依般若波罗蜜多住，心无障碍。心无障碍故，无有恐怖，远离颠倒梦想，究竟寂然。三世诸佛依般若波罗蜜多故，得阿耨多罗三藐三菩提，现成正觉。故知般若波罗蜜多，是大真言，是大明真言，是无上真言，是无等等真言。能除一切苦，真实不虚。故说般若波罗蜜多真言。」

即说真言：

「唵(引) 誡帝 誡帝 播(引)囉誡帝 播(引)囉散誡帝 冒(引)地 娑縛(二合) 贺(引)」

「如是，舍利子！诸菩萨摩訶萨，于甚深般若波罗蜜多行，应如是学。」

尔时，世尊从三摩地安祥而起，赞观世音自在菩萨摩訶萨言：「善哉，善哉！善男子！如是，如是！如汝所说。甚深般若波罗蜜多行，应如是行。如是行时，一切如来悉皆随喜。」

尔时世尊如是说已，具寿舍利子，观世音自在菩萨，及彼众会一切世间天、人、阿苏囉、嚩驮囉等，闻佛所说，皆大欢喜，信受奉行。

## 般若波罗蜜多心经

---

【经文信息】大正藏第 08 册 No. 0254 般若波罗蜜多心经

【版本记录】CBETA 电子佛典 Rev. 1.12 (Big5)，完成日期：2009/04/23

【编辑说明】本数据库由中华电子佛典协会（CBETA）依大正藏所编辑

【原始数据】庄德明大德提供，CBETA 自行扫描辨识，CBETA 提供新式标点，其他

【其他事项】本数据库可自由免费流通，详细内容请参阅【中华电子佛典协会数据库版权宣告】

---